

Монгол Улсын Их Хурлын Хууль зүйн
байнгын хорооны 2026 оны 04 дүгээр
сарын 29-ний өдрийн 04 дүгээр
тогтоолын 9 дүгээр хавсралт

**МОНГОЛ УЛСЫН ИХ ХУРЛЫН ХУУЛЬ ЗҮЙН БАЙНГЫН ХОРООНД
САНАЛ БОЛГОСОН ШҮҮХИЙН ЕРӨНХИЙ ЗӨВЛӨЛИЙН ШҮҮГЧ БУС
ГИШҮҮНД НЭР ДЭВШИГЧИЙН ТАЛААРХ АЖЛЫН ХЭСГИЙН ТАЙЛАН**

Товч удирдамж: Шүүхийн ерөнхий зөвлөлийн болон Шүүхийн сахилгын хорооны шүүгч бус гишүүнийг сонгон шалгаруулах журам /цаашид “журам” гэх/-ын 12.1, 12.2, 12.3, 12.4, 12.6-д заасны дагуу Ажлын хэсэг нь олонхын саналаараа Монгол Улсын Их Хурлын Хууль зүйн байнгын хороонд санал болгосон нэр дэвшигчийн талаарх тайланг энэхүү загварт нийцүүлэн бичих үүрэгтэй.

1	Эцэг/эхийн нэр: Базаррагчаа Ургийн овог: Боржигон Нэр: Даваажав Хүйс: Эрэгтэй Төрсөн он: 1985 Төрсөн газар: Улаанбаатар хот, 1-р амаржих газар Одоо оршин суугаа аймаг/нийслэл, сум/дүүрэг: Улаанбаатар хот, Сүхбаатар дүүрэг.
Сонгон шалгаруулалт, түүний үе шат, явуулсан ажиллагааны танилцуулга Сонгон шалгаруулалтын есөн үе шат тус бүрийг журмын Дөрөв, Тав, Зургаа, Долоо, Найм, Ес, Арав, Арван нэг, Арван хоёр, Арван гуравт заасны дагуу хэрхэн хэрэгжүүлсэн талаар тодорхой, ойлгомжтой бичнэ.	
2	Нэгдүгээр үе шат <i>Монгол Улсын шүүхийн тухай хууль /Шинэчилсэн найруулга/-иар Шүүхийн ерөнхий зөвлөлийн шүүгч бус гишүүн болон Шүүхийн сахилгын хорооны шүүгч бус гишүүнийг Монгол Улсын Их Хурлаас нээлттэйгээр нэр дэвшүүлж, сонгон шалгаруулж томилохоор заасны дагуу 2026 оны 05 дугаар сарын 07-ны өдрөөс 05 дугаар сарын 27-ны өдрийн 17 цаг 30 минут хүртэл нэр дэвших тухай хүсэлт, баримт бичгийг хүлээн авах тухай зарыг Монгол Улсын Их Хурлын цахим хуудас, Монгол үндэсний олон нийтийн радио телевиз, хэвлэл мэдээллийн сайт болон өдөр тутмын хоёроос доошгүй өдрийн сонинд нийтлүүлж нийтэд мэдээлсэн.</i>
3	Хоёрдугаар үе шат <i>Хууль зүйн байнгын хорооны 2026 оны 05 дугаар сарын 05-ны өдрийн 05 дугаар тогтоолоор сонгон шалгаруулалтын бүртгэлийн хугацааг тогтоож, хүсэлт, баримт бичгийг 21 хоногийн хугацаанд хүлээн авахаар нийтэд мэдээлсэн бөгөөд Шүүхийн ерөнхий зөвлөлийн шүүгч бус гишүүнд нэр дэвшигч Б.Даваажав нь хүсэлт, холбогдох баримт бичгээ хугацаанд нь буюу 2026 оны 05 дугаар сарын 27-ны өдөр ирүүлснийг Байнгын хорооны ажлын алба хүлээн авсан.</i>
4	Гуравдугаар үе шат <i>Монгол Улсын шүүхийн тухай хууль /Шинэчилсэн найруулга/-ийн 77 дугаар зүйлийн 77.2-т “Ажлын хэсэг нь Улсын Их Хурал дахь олонх, цөөнх, Ерөнхийлөгч, Засгийн газар, Хүний эрхийн Үндэсний Комисс, Монголын Хуульчдын холбоо, Монголын Өмгөөлөгчдийн холбоо, хууль зүйн сургалт, судалгааны байгууллага, хууль зүйн их, дээд сургуулийн санал болгосон төлөөллөөс бүрдсэн 11 гишүүний бүрэлдэхүүнтэй байх бөгөөд ажлын хэсгийг Улсын Их Хурлын даргын захирамжаар томилсон Улсын Их Хурлын гишүүн ахална.” гэж заасан.</i> <i>Дээрх заалтын дагуу Хууль зүйн байнгын хорооны 2026 оны 05 дугаар сарын 19-ний өдрийн 07 дугаар тогтоолоор Шүүхийн ерөнхий зөвлөлийн шүүгч бус гишүүнийг сонгон шалгаруулах үүрэг бүхий ажлын хэсгийг Улсын Их Хурлын даргын гишүүн Д.Ганбат ахалж, гишүүдэд Улсын Их Хурал дахь Монгол Ардын намын</i>

	бүлгийн Ажлын албаны дарга Ч.Сарангэрэл, Улсын Их Хурал дахь Ардчилсан намын бүлгийн зөвлөх Д.Батмөнх, Хүний эрхийн Үндэсний Комиссын дарга Д.Сүнжид, Засгийн газрын Хэрэг эрхлэх газрын Хууль, эрх зүйн газрын дарга Я.Жавхлан, Монгол Улсын Ерөнхийлөгчийн Тамгын газрын Хуулийн бодлогын газрын дарга Ж.Мөнхболд, Монголын Өмгөөлөгчдийн холбооны гишүүн З.Сүхбаатар, Монголын Хуульчдын холбооны Зөвлөлийн гишүүн Б.Баасандорж, Монгол Улсын Их Сургуулийн Хууль зүйн сургуулийн захирал, профессор Б.Амарсанаа, “Шихихутуг” их сургуулийн Судалгааны хүрээлэнгийн захирал, доктор, профессор Б.Нармандах, Үндсэн хуулийн эрх зүйн хүрээлэнгийн багш С.Сүхчулуун нарын бүрэлдэхүүнтэй байгуулсан.
5	Дөрөвдүгээр үе шат Ажлын хэсэг 2026 оны 05 дугаар сарын 27-ны өдөр хуралдаж Монгол Улсын шүүхийн тухай /Шинэчилсэн найруулга/ хууль болон Хууль зүйн байнгын хорооны 2026 оны 04 дүгээр сарын 29-ний өдрийн 04 дүгээр тогтоолоор баталсан “Шүүхийн ерөнхий зөвлөлийн болон Шүүхийн сахилгын хорооны шүүгч бус гишүүнийг сонгон шалгаруулах журам”-д заасан баримт бичгийн шаардлагыг хангасан гэж үзэн Шүүхийн ерөнхий зөвлөлийн шүүгч бус гишүүнд 12 иргэнийг нэр дэвшигчээр бүртгэсэн бөгөөд 2 иргэнийг хуульд заасан “эрх зүйчээр 10-аас доошгүй жил ажилсан байх” гэсэн шаардлага нотлогдоогүй гэж үзэн бүртгэхээс татгалзсан болно. Ажлын хэсгийн энэхүү хуралдаанаар хүсэлт, баримт бичгээ ирүүлсэн Б.Даваажавыг Шүүхийн ерөнхий зөвлөлийн шүүгч бус гишүүний сонгон шалгаруулалтад нэр дэвшигчээр бүртгэсэн.
6	Тавдугаар үе шат “Шүүхийн ерөнхий зөвлөлийн болон Шүүхийн сахилгын хорооны шүүгч бус гишүүнийг сонгон шалгаруулах журам”-ын 9.1-д “нэр дэвшигчээр бүртгэснээс хойш ажлын нэг өдрийн дотор нэр дэвшигчдийн нэрс, нэр дэвших тухай хүсэлт, холбогдох бусад мэдээллийг Улсын Их Хурлын цахим хуудаст байршуулж, нийтэд түгээнэ.” гэж заасны дагуу дээр дурдсан 12 нэр дэвшигчийн баримт бичгийг www.parliament.mn Улсын Их Хурлын цахим хуудаст байршуулсан. Б.Даваажавын нэр дэвших тухай хүсэлт, холбогдох бусад мэдээллийг Улсын Их Хурлын албан ёсны цахим хуудаст 2026 оны 06 дугаар сарын 02-ны өдрөөс эхлэн нээлттэй байршуулсан.
7	Зургадугаар үе шат Хууль зүйн байнгын хорооны 2026 оны 04 дүгээр тогтоолоор баталсан “Шүүхийн ерөнхий зөвлөлийн болон Шүүхийн сахилгын хорооны шүүгч бус гишүүнийг сонгон шалгаруулах журам”-ын 10.1-д “Энэ журмын 9.1-д заасны дагуу бүртгэсэн шийдвэр гармагц Ажлын хэсэг нэр дэвшигчийг Ажлын хэсгийн ахлагчаас бусад гишүүн бүрд тохиолдлын журмаар тэнцвэртэй хуваарилж илтгэгч гишүүнийг томилно” гэж заасныг баримтлан 2026 оны 06 дугаар сарын 02-ны өдрийн Ажлын хэсгийн хуралдаанаар нэр дэвшигч тус бүрийн илтгэгч гишүүнийг сугалаагаар тодруулж, илтгэгч гишүүнийг томилсон. Нэр дэвшигч Б.Даваажавын илтгэгч гишүүнээр Ажлын хэсгийн гишүүн З.Сүхбаатар, Я.Жавхлан нар сонгогдсон бөгөөд илтгэгч гишүүн Журмын 10.4-т заасан ажиллагааг явуулж холбогдох мэдээллийг цуглуулсан.
8	Долдугаар үе шат Хууль зүйн байнгын хорооны 2026 оны 04 дүгээр тогтоолоор баталсан “Шүүхийн ерөнхий зөвлөлийн болон Шүүхийн сахилгын хорооны шүүгч бус гишүүнийг сонгон шалгаруулах журам”-ын 11.1-д “Энэ журмын 10.10-д заасан хугацаа дууссанаас хойш ажлын таван өдрийн дотор нэр дэвшигчийн талаар бүрдүүлсэн мэдээллийг нягтлах, тодруулах зорилгоор Ажлын хэсэг хэлэлцүүлэг зохион байгуулна.” гэж, 11.2-д “Ажлын хэсэг зургаагаас доошгүй тооны гишүүний ирцтэйгээр хэлэлцүүлгийг хийх бөгөөд Ажлын хэсгийн ахлагч даргална.” гэж заасан.

	<i>Ажлын хэсгийн гишүүд 2026 оны 06 дугаар сарын 25-ны өдөр Төрийн ордны “Үндсэн хууль танхимд” нэр дэвшигч Б.Даваажавтай ажлын хэсгийн хэлэлцүүлгийг зохион байгуулсан.</i>
9	Наймдугаар үе шат <i>“Шүүхийн ерөнхий зөвлөлийн болон Шүүхийн сахилгын хорооны шүүгч бус гишүүнийг сонгон шалгаруулах журам”-ын 12.1-д “Энэ журмын 11.6-д заасан хугацаа дууссанаас хойш ажлын дөрвөн өдрийн дотор Ажлын хэсэг дараах журмаар хуралдаж Ерөнхий зөвлөлийн эсхүл Сахилгын хорооны шүүгч бус гишүүнд нэр дэвшүүлэх эсэхийг шийдвэрлэнэ.” гэж, мөн журмын 13.2-т “Ажлын хэсэг энэ журмын 13.1-д заасан нэр дэвшигчийн нэр, тэдгээрийн талаарх Ажлын хэсгийн тайлан, холбогдох баримт бичгийг Байнгын хороонд хүргүүлнэ.” гэж заасны дагуу саналаа Хууль зүйн байнгын хороонд хүргүүлэх зохицуулалттай.</i> <i>Ажлын хэсэг Монгол Улсын шүүхийн тухай хуулийн 77 дугаар зүйлийн 77.4.5-т “Энэ хуулийн 77.4.4-т заасан санал хураалтын дүнгээр Ажлын хэсгийн гишүүдийн олонхын санал авсан нэр дэвшигчийг саналын дарааллаар эрэмбэлэн сул орон тоогоор болон дараагийн олонхын санал авсан хоёр хүртэл хүний хамт нэр дэвшүүлж, Байнгын хороонд тайлангийн хамт ажлын гурван өдрийн дотор хүргүүлэх.” гэж заасан. Ажлын хэсэг 2026 оны 07 дугаар сарын 02-ны өдөр хуралдаж, илтгэгч гишүүн бүр өөрсдийн судалсан нэр дэвшигчийн талаарх дэлгэрэнгүй тайланг танилцуулж, ажлын хэсгийн бусад гишүүн саналаа хэлж, асуулт асууж хэлэлцсэн. Үүний дараагаар санал хураалтыг нууцаар явуулахад нэр дэвшигч Б.Даваажавыг Ажлын хэсгийн 6 гишүүн дэмжиж, олонхын санал авсан тул Шүүхийн ерөнхий зөвлөлийн шүүгч бус гишүүнд нэрийг нь дэвшүүлэхээр шийдвэрлэсэн.</i>
10	Есдүгээр үе шат <i>Ажлын хэсэг Монгол Улсын шүүхийн тухай хуульд заасны дагуу нэр дэвшигч Б.Даваажавыг Хууль зүйн байнгын хороонд санал болгохоор тогтож, Ажлын хэсгийн тогтоол баталсан болно.</i>
11	Сонгон шалгаруулалтын үйл явцыг нэгтгэн дүгнэх нь <i>Ажлын хэсэг Монгол Улсын шүүхийн тухай хууль /Шинэчилсэн найруулга/ болон “Шүүхийн ерөнхий зөвлөлийн болон Шүүхийн сахилгын хорооны шүүгч бус гишүүнийг сонгон шалгарууларх” журамд заасны дагуу бүрэн эрхээ хэрэгжүүлж, сонгон шалгаруулалтыг хууль, журамд заасны дагуу зохион байгуулж явуулсан болно.</i>
Шүүхийн ерөнхий зөвлөлийн шүүгч бус гишүүнд тавих шаардлагыг хангасан тухай үнэлгээ Нэр дэвших тухай хүсэлт, түүний хавсралт, нэр дэвшигчийн хэвлүүлсэн бүтээл, олон нийтэд өгсөн мэдээлэл, олон нийтээс ирүүлсэн асуулт, санал, нэр дэвшигчийн талаар бусад хүмүүстэй хийсэн ярилцлага, нэр дэвшигчтэй илтгэгч гишүүний ганцаарчлан хийсэн ярилцлага, Ажлын хэсгийн хэлэлцүүлэг, илтгэгч гишүүний дэлгэрэнгүй тайлан, нэр дэвшигчээс болон бусад этгээдээс гаргуулан авах зэргээр цуглуулсан мэдээлэл, баримт бичиг, нотлох баримтад тулгуурлан нэр дэвшигчид тавих шаардлагыг яагаад хамгийн сайн хангасан гэж үнэлж дүгнэсэн тухайгаа журмын 12.6.3-т заасны дагуу ойлгомжтой, тодорхой бичнэ.	
12	Хууль зүйн өндөр мэргэшилтэй: хууль зүйн өндөр мэдлэг, чадвар, туршлагатай тухай <i>Нэр дэвшигч Б.Даваажавын ирүүлсэн анкет, мэргэжлийн үйл ажиллагааны танилцуулга, боловсролын болон мэргэжлийн баримт, бүтээл, илтгэл, тодорхойлолт, нэмэлт асуулгын хариулт, бусад хүмүүсээс ирүүлсэн мэдээллийг судлахад нэр дэвшигч нь хууль зүйн салбарт олон чиглэлээр ажилласан туршлагатай байна.</i> <i>Нэр дэвшигч нь 2008 онд эрх зүйч мэргэжлээр төгссөн, 2008-2009 онд цагдаагийн байгууллагад хэсгийн төлөөлөгчөөр, 2009-2018 онд Цагдаагийн академи, Хууль сахиулахын их сургууль, Дотоод хэргийн их сургуульд иргэний эрх зүй, иргэний процесс, эрх зүйн онолын чиглэлээр багшаар ажилласан, 2012 оноос хуульчийн</i>

	мэргэжлийн үйл ажиллагаа, 2013 оноос өмгөөллийн үйл ажиллагаа эрхэлсэн талаар материалд тусгагдсан байна. Энэ нь хууль зүйн сургалт, судалгаа, төрийн тусгай алба болон өмгөөллийн практикийг хослуулсан туршлага гэж үзэх үндэслэлтэй. Мөн нэр дэвшигчийн ирүүлсэн бүтээл, илтгэл, өгүүллийн жагсаалт болон хавсаргасан материалд шүүх хуралдааны аюулгүй байдал, шүүх эрх мэдэл, иргэний эрх зүй, иргэний хэрэг шүүхэд хянан шийдвэрлэх ажиллагаа, гэр бүлийн эрх зүй, захиргааны зөрчил, эрх зүйн онол зэрэг чиглэлээр судалгаа хийж, илтгэл, өгүүлэл нийтлүүлсэн талаар тусгагдсан байна. Нэмэлт асуулгын хариултад нэр дэвшигч ШЕЗ-ийн чиг үүргийг шүүхийн хараат бус байдал, сонгон шалгаруулалтын ил тод байдал, шүүхийн үйлчилгээний чанар, шүүх хуралдааны зохион байгуулалттай холбон тайлбарласан нь тухайн байгууллагын чиг үүргийг ойлгож байгаа байдлыг харуулж байна. Бусад хүмүүсээс ирүүлсэн хариулт, тодорхойлолтуудад нэр дэвшигчийг хууль зүйн асуудлыг онол, практикийн уялдаатай авч үздэг, судалгаанд суурилсан тайлбар гаргадаг, багшлах болон өмгөөллийн ажлын туршлагатай гэж дурдсан байна. Үүний зэрэгцээ зарим мэдээлэлд нэр дэвшигч мэргэжлийн байр сууриа шууд илэрхийлэх хандлагатай тул олон талын оролцоотой байгууллагад ажиллахдаа зөвшилцөлд хүрэх арга барил, харилцааны хэлбэрийг анхаарах шаардлагатай байж болох талаар тэмдэглэсэн байна. Дүгнэвэл цуглуулсан баримт, мэдээллийн хүрээнд нэр дэвшигч Б.Даваажав нь хууль зүйн боловсрол, багшлах болон судалгааны дадлага, хуульч, өмгөөлөгчийн практик, шүүхийн ажиллагаатай холбоотой судалгааны туршлагатай байх тул Шүүхийн тухай хуулийн 76 дугаар зүйлийн 76.3 дахь хэсэгт заасан “хууль зүйн өндөр мэдлэг, чадвар, туршлагатай” байх шаардлагыг хангаж байна гэж дүгнэж байна.
13	Хууль зүйн өндөр мэргэшилтэй: мэргэжлийн ёс зүйн өндөр шаардлага хангасан тухай Нэр дэвшигч Б.Даваажавын мэргэжлийн ёс зүй, хараат бус, зарчимч ажиллах чадварыг ирүүлсэн тодорхойлолт, эрх бүхий байгууллагын лавлагаа, нэмэлт асуулгын хариулт, бусад хүмүүсээс ирүүлсэн мэдээлэлд тулгуурлан үнэлэв. Ирүүлсэн материалд нэр дэвшигч нь эрх зүйч мэргэжлээр ажиллах хугацаандаа сахилга, ёс зүйн зөрчил гаргаж сахилгын шийтгэл хүлээж байгаагүй гэж өөрөө тайлбарласан байна. Мөн Монголын Хуульчдын холбоо, Монголын Өмгөөлөгчдийн холбоо, мэргэжлийн хариуцлагын холбогдох байгууллагуудаас ирүүлсэн мэдээлэл, тодорхойлолтод нэр дэвшигч хуульч, өмгөөлөгчийн мэргэжлийн үйл ажиллагаанд ёс зүйн болон сахилгын ноцтой зөрчил гаргасан талаар мэдээлэл тусгагддаагүй байна. Цагдаагийн ерөнхий газрын 2026 оны 05 дугаар сарын 27-ны өдрийн лавлагаагаар эрүүгийн хариуцлага хүлээж байгаагүй талаар тусгагдсан байна. Бусад хүмүүсээс ирүүлсэн хариулт, тодорхойлолтуудад нэр дэвшигчийг ажилдаа хариуцлагатай, зарчимч, мэргэжлийн байр сууриа баримталдаг, ашиг сонирхлын зөрчил гаргасан, бусдад давуу байдал олгосон, байгууллагын нэр нөлөөг хувийн зорилгоор ашигласан байдал ажиглагдаагүй гэж дурдсан байна. Мөн улс төрийн болон бусад этгээдийн зүй бус нөлөөлөлд автсан, хараат бус байдалд нь эргэлзээ төрүүлэхүйц нөхцөл байдал байсан талаар тодорхой мэдээлэл ирээгүй байна. Нэр дэвшигч өөрийн нэмэлт хариултад ашиг сонирхлын зөрчил үүссэн буюу үүсэж болзошгүй тохиолдолд тухайн нөхцөл байдлыг ил тод мэдэгдэх, хэлэлцүүлэг, санал хураалт, шийдвэр гаргах ажиллагаанд оролцохгүй байх, шаардлагатай бол татгалзан гарах үндэслэлээ бичгээр бүртгүүлэх зарчим

	баримтална гэж тайлбарласан. Мөн улс төрийн болон бусад дарамт, шахалт ирвэл баримтжуулж, ШЕЗ-ийн холбогдох механизм болон эрх бүхий байгууллагад мэдэгдэх, шийдвэрийг хууль, баримт, мэргэжлийн шалгуурт тулгуурлан гаргана гэж хариулсан байна. Судалсан мэдээлэлд нэр дэвшигчийн мэргэжлийн ёс зүй, хараат бус байдалд шууд эргэлзээ төрүүлэхүйц баримт тогтоогдоогүй. Харин зарим хариултад нэр дэвшигч мэргэжлийн байр сууриа шууд, хүчтэй илэрхийлэх хандлагатай тул олон талын оролцоотой байгууллагад ажиллахдаа харилцааны хэлбэр, зөвшилцөлд хүрэх арга барилыг анхаарах шаардлагатай байж болох талаар дурдсан байна. Энэ нь ёс зүйн зөрчил гэхээс илүү ажлын арга барилтай холбоотой ажиглалт гэж үзэв. Дүгнэвэл цуглуулсан баримт, мэдээллийн хүрээнд нэр дэвшигч Б.Даваажав нь бусдын зүй бус нөлөөнд автсан, ашиг сонирхлын зөрчил гаргасан, мэргэжлийн ёс зүйн ноцтой зөрчил гаргасан гэх нөхцөл байдал тогтоогдоогүй тул Шүүхийн тухай хуулийн 76 дугаар зүйлийн 76.3 дахь хэсэгт заасан “бусдын нөлөөнд автахгүй, хараат бусаар ажиллах, зарчимч, шударга зан төлөвтэй, мэргэжлийн ёс зүйн өндөр шаардлагыг хангасан” байх шаардлагыг хангаж байна.
14	Эрх зүйч мэргэжлээр 10-аас доошгүй жил ажилласан тухай Нэр дэвшигч Б.Даваажавын ирүүлсэн анкет, мэргэжлийн үйл ажиллагааны танилцуулга, боловсролын баримт, нийгмийн даатгалын болон ажилласан байдлын холбогдох мэдээлэл, мөн тодорхойлолтуудыг судлахад нэр дэвшигч нь 2008 онд Цагдаагийн академийг эрх зүйч мэргэжлээр төгссөн байна. Ирүүлсэн материалд нэр дэвшигч 2008-2009 онд Хэнтий аймгийн цагдаагийн байгууллагад хэсгийн төлөөлөгчөөр, 2009-2018 онд Цагдаагийн академи, Хууль сахиулахын их сургууль, Дотоод хэргийн их сургуульд иргэний эрх зүй, иргэний процесс, эрх зүйн онолын чиглэлээр багшаар ажилласан, 2012 оноос хуульчийн мэргэжлийн үйл ажиллагаа, 2013 оноос өмгөөллийн үйл ажиллагаа эрхэлсэн талаар тусгагдсан байна. Эдгээр ажил, үйл ажиллагаа нь эрх зүйч мэргэжлийн мэдлэг, ур чадвар шаардах ажилд хамаарч байна. Нэр дэвшигчийн ажилласан хугацааг 2008 оноос тооцвол сонгон шалгаруулалтын материал бүрдүүлсэн 2026 оны байдлаар эрх зүйч мэргэжлээр 10-аас дээш жил ажилласан байна. Мөн багшлах, хуульчийн мэргэжлийн үйл ажиллагаа, өмгөөллийн практик нь хугацааны хувьд давхцалтай ч тус бүр нь хууль зүйн мэргэжлийн чиг үүрэгтэй холбоотой байна. Иймд цуглуулсан баримт, мэдээллийн хүрээнд нэр дэвшигч Б.Даваажав нь Шүүхийн тухай хуулийн 76 дугаар зүйлийн 76.3 дахь хэсэгт заасан “эрх зүйч мэргэжлээр 10-аас доошгүй жил ажилласан” байх шаардлагыг хангаж байна гэж дүгнэв.
15	Төрийн алба хаах насны дээд хязгаарт хүрээгүй тухай Б.Даваажав нь 1985 онд төрсөн. Төрийн алба хаах насны дээд хязгаарт хүрээгүй.
16	Шүүгчээр ажиллаж байгаагүй тухай Цуглуулсан баримт, мэдээллийн хүрээнд нэр дэвшигч Б.Даваажав нь Шүүхийн тухай хуулийн 76 дугаар зүйлийн 76.3 дахь хэсэгт заасан “сүүлийн таван жил шүүгчээр ажиллаж байгаагүй” байх шаардлагыг хангаж байна гэж дүгнэв.
17	Сүүлийн таван жилд улс төрийн болон намын удирдах албан тушаал хашиж байгаагүй тухай Б.Даваажав нь улс төрийн болон намын удирдах албан тушаал хашиж байгаагүй. Нэр дэвшигчийн нийгмийн даатгалын шимтгэл төлөлтийн талаарх тодорхойлолт болон хавсралтаар ирүүлсэн бусад мэдээлэлээр нотлогдсон.
18	Эрүүгийн хариуцлага хүлээж байгаагүй тухай Нэр дэвшигч Б.Даваажавын ирүүлсэн нэр дэвших тухай хүсэлт, анкет, нэмэлт асуулгын хариулт болон эрх бүхий байгууллагаас гаргуулан авсан лавлагааг

	судлав. Төрийн үйлчилгээний нэгдсэн системээр дамжуулан мэдээлэл хариуцагчаас олгосон 2026 оны 05 дугаар сарын 27-ны өдрийн Цагдаагийн ерөнхий газрын лавлагаа, тодорхойлолтод нэр дэвшигч эрүүгийн хариуцлага хүлээж байгаагүй талаар тусгагдсан байна. Мөн нэр дэвшигчийн өөрийн ирүүлсэн материал, нэмэлт тайлбарт эрүүгийн хариуцлага хүлээж байсан талаар мэдээлэл тусгаадаагүй. Ирүүлсэн бусад тодорхойлолт, ярилцлагын хариултад нэр дэвшигч эрүүгийн хариуцлага хүлээж байсан гэх зөрүүтэй мэдээлэл байхгүй байна. Иймд цуглуулсан баримт, мэдээллийн хүрээнд нэр дэвшигч Б.Даваажав нь Шүүхийн тухай хуулийн 76 дугаар зүйлийн 76.3 дахь хэсэгт заасан “эрүүгийн хариуцлага хүлээж байгаагүй” байх шаардлагыг хангаж байна гэж дүгнэв.
19	Монгол Улсын иргэн мөн тухай Нэр дэвшигч Б.Даваажавын ирүүлсэн анкет, нэр дэвших тухай хүсэлт болон хавсаргасан иргэний үнэмлэхийн мэдээллийг судлахад нэр дэвшигч нь Монгол Улсын иргэн болох нь тусгагдсан байна. Ирүүлсэн бусад материалд нэр дэвшигчийн иргэний харьяалалтай зөрчилдөх мэдээлэл байхгүй байна. Иймд цуглуулсан баримт, мэдээллийн хүрээнд нэр дэвшигч Б.Даваажав нь Шүүхийн тухай хуулийн 76 дугаар зүйлийн 76.3 дахь хэсэгт заасан “Монгол Улсын иргэн” байх шаардлагыг хангаж байна гэж дүгнэв.
20	Шүүхийн ерөнхий зөвлөлийн шүүгч бус гишүүнд санал болгох үндэслэлүүдийг нэгтгэн дүгнэх нь Нэр дэвшигч Б.Даваажав нь ШтХ-ийн 76 дугаар зүйлийн 76.3-т заасан ШЕЗ-ийн шүүгч бус гишүүнд тавигдах шаардлага болох хууль зүйн өндөр мэргэшилтэй, эрх зүйч мэргэжлээр 10-аас доошгүй жил ажилласан, төрийн алба хаах насны дээд хязгаарт хүрээгүй, сүүлийн таван жил шүүгч, улс төрийн албан тушаал болон улс төрийн намын удирдах албан тушаал эрхэлж байгаагүй, эрүүгийн хариуцлага хүлээж байгаагүй Монгол Улсын иргэн байх шаардлагыг бүрэн хангаж байх тул нэр дэвшигч Б.Даваажав нь холбогдох хууль, журамд заасан Шүүхийн ерөнхий зөвлөлийн шүүгч бус гишүүнд тавигдах шаардлагыг хангаж байна гэж ажлын хэсэг үзсэн болно.

**Шүүхийн ерөнхий зөвлөлийн шүүгч бус гишүүнийг сонгон
шалгаруулах үүрэг бүхий ажлын хэсэг**